


內  
官  
閣  
旁  
求志





內閣志

席鑒吳撰

叢書集 成 初 編

(本印補)

內閣志及其他種一

一九三七年六月初版

一九五九年十月補印

商務印書館出版

上海華文印刷廠印刷

# 內閣志

清常熟席吳鑒寶箴撰

鑒退居里中日無事追憶服官繪屏時所見所知者爲內閣志竊附于不賢者識小之列于國典紀載不爲臚陳俟後之君子參而考焉

內閣在五門內太和門外自五門循牆而東升太和門東廊之南頭下乃抵焉後戶斜直文華殿出東華門可三百步許自後戶直北可六七百步至景運門即乾清門之右掖門也于禁廷最爲密邇外曹百司無故不得輒入違者重辟論今堂戶之上懸金書扁具載此令世祖時建云門周四十里南正陽南左崇文南宣武北之東安定北之西德誇東之北東直東之南朝誇西之北西直西之南阜城皇城七門周十八里零南永定左左安右右安東廣渠西廣寧東隔東便四隅西便內五門太和東華景運乾清隆宗

其設官則有大學士學士侍讀學士侍讀中書舍人典籍明獨有大學士及兩房舍人餘官本朝設大學士與學士並滿漢分設學士參用蒙古員大學士則否侍讀學士侍讀向無漢員雍正初始設漢侍讀後又設掌副本漢舍人自大學士下合百餘員官職滋繁于前矣此言內閣官制

大學士所居曰堂舍人所居曰房典籍所居曰廳其外又有滿洲堂蒙古堂侍讀學士至舍人咸居之而侍讀之分領各房者多與舍人接席治事焉此言舍人所居之房而先言大學士之堂尚尊也

大學士堂上南嚮坐。虛其中敬至尊也。滿左漢右學士東西嚮坐亦滿左漢右侍讀學士升堂。大學士爲起或不侍讀以下侍立問對與學士則皆對揖。此言大學士學

侍讀學士異于學士者不得堂上坐耳。于大學士不爲屬侍讀以下爲屬然其稱謂如師生不似外曹之堂司也。外曹惟禮部與內閣爲近。此言侍讀學士

明重首揆次輔幾不敢與齒。本朝閣臣少所差別。在國典則有押班一人屬之滿大學士餘次序之先後。皆請旨定之。其私相稱謂則先入者爲前輩後入者爲後輩學士以下于其儕輩皆然有後入而官少尊者其執禮如故。如舍人言侍讀然唯漢人能習之。

明大學士秩五品有遷尚書職者其列銜主尚書而以大學士爲兼官尚書尊故也。加孤卿則序銜又先之。其後閣臣班位竟列六部上然本秩如故。雍正中始定大學士秩一品雖不加公孤尊莫與抗而尚書爲其兼官蓋其來已久不謂之真宰相得乎。此言大學士品秩之尊

大學士缺吏部列名以請惟六尚書一都御史而已。有由內大臣及外總督等官拜者乃出特旨不在開列內又有遙授外臣而不入閣者亦繫正員非若漢以左丞相唐以平章事寵武臣者比其外又有額外大學士協辦大學士額外得缺輒卽真。協辦有終不得者皆一時用人之權宜非常例也。此言大學士缺有開列有特旨有遙拜其外又有額外缺協辦缺

凡大學士初命入閣。是日內閣翰林官並先集五門內及門兩典籍引而入。升東廊階。悉從升至閣。若滿大學士先坐滿洲堂。受滿侍讀以下謁。漢大學士則不抵閣之內門。學士迎于塔上堂揖就坐。侍讀學士升堂揖。其餘以次升。揖皆三。于侍讀學士離坐答。餘皆立答半揖或舉手答。翰詹開坊以上官升堂揖。亦離坐答。送不出堂戶。編檢以下庭下揖亦答半揖。故事。大學士由翰林起家者。先于翰林院受任。院有堂。唯大學士坐此。是以相沿有中堂之稱。然近來多逕赴閣中矣。此大學士入閣儀注。

大學士于軍國事無所不統。詳在會典。茲不載。其實每日所治事。則閱本也。本有二。曰部本。在京部院進者。曰通本。外文武大臣及奉使員具本。送通政使轉上者。票擬皆舍人按故事爲之。大學士晨入。畫可否。然少所更定。閱已。次閱絲綸簿。又次閱章奏文書。日亭午。蔑不出矣。大學士事無不統。其每日所繪惟以閱本爲事。

大學士佐天子理機務。得不時召見。其治事未嘗不在閣。雍正中以邊事設軍需房于隆宗門外。後又謂之軍機房。時則有馬公張公蔣公三大學士參領軍機。有鄂公之後常居中候。伺日一再見。遂不至閣。惟駕在西苑。蔣公聞日至。其後又以起草覆奏寄字外省。與夫閣務有特建者。皆自內主之。舍人在閣書寫。出入多稽滯。乃設直房于軍機房之旁。擇滿侍讀以下數人。漢侍讀一人。舍人二人。入直專治內事。其入直者亦不復至閣。至乾隆初。邊事息。軍機房不廢。由是大學士以下。有內外廷之判矣。大學士之治事也。待召見。則在軍機房。此大學士以下。所以有內外廷之判也。

大學士之在內者始由內廷供奉其後以與軍機益有名然亦未嘗至所謂軍機房者往往晨朝坐乾清門外板屋中少頃或徑入百僚趨而稟事懼弗逮既召見有事出輒入直房唯西苑則在軍機房食于大官日兩餐退以申爲期人咸知爲天子所尤倚任也其在內廷供奉者或在南書房或內直房惟西苑則在軍機房

凡辦本之次舍人閱已先書草簽侍讀詳看大學士審定之舍人以所草登于籍謂之草簽簿隨書真簽簽以奏本紙爲之其式縱可七寸許橫視其字多寡滿漢文具一幅上滿文左行漢文右行中填日月某部某督撫某事紙背列舍人書簽者姓名乃送滿票簽房夾置于本而加檢視之而加整齊之凡今日所辦明日上滿舍人捧至宮門送紅本上檢閱遞進紅批處在乾清門內不設專官謂之紅本上云御覽畢復交紅本上依簽朱書于本尾滿舍人候本發接出至閣漢學士乃朱書于本面字極大蓋本內墨跡書之無礙交漢票簽房登于籍謂之絲綸簿其簽封貯之然後以本分類發料料抄發部計一本之進經數十手而其事甫畢其縝密詳慎如此辦本次第

凡票擬吏兵部遷除本其簽式上空姓名下書補授某官姓名皆御筆朱書填之此用人詳審之道而臣下之得被選擇者亦榮矣吏兵部遷除本姓名皆御筆

凡用京闈考官及勾決刑部囚其本皆密封至閣開勾決本尤防漏洩候勾到後于內補繕票簽惟與其事二三人知之考官及決囚其本皆密封

凡本內兩擬簽上曰健簽御覽用其一則中破其一以閣簽爲未允御筆改或令大學士改曰改簽待改不輒定本不以期下曰留中本積四五件或十數件天子爲之御門集槐棘平議以決焉雙簽改簽留中本留中本積歲終時則不及御門並于百司封篆前一日下其所改簽大學士受旨而出在乾清門視草舍人挾紙筆以從俟進御更定輒書之或大學士口授書以疾速不悞爲工是日發本竟往往晝漏盡矣

留中本  
歲終下

凡不進本日有三聖祖忌日孔子誕日佛誕日其外輟朝日亦止不進不進本日

明閣務之壞由于內監之批紅輔臣票擬後拱手待決今之紅本上與漢學士所掌卽其職也學士大臣知自愛重紅本上無專員取他官五品以下充之其委寄旣非閤寺比而所進票擬又無不至上前者是以悚息無敢玩法焉紅本上一職即明之批紅

學士侍讀學士侍讀典籍之設皆視翰林院特其職掌異耳滿學士御門讀本侍讀學士總閱翻譯侍讀領諸舍人事典籍掌史籍及奉行文書有印篆至閣中章奏如名號謚法之上請皆其所擬也內閣諸臣各有掌

凡進御之本必滿漢文兼通本獨有漢文故翻譯房則主譯文滿本房則主繕寫又有所改本也譯文未善則改之計每日進御累數十件矻矻辦理常懼不及謹國制故也凡職掌不詳列以上三條並奉聯言之

舍人之侍直有日直有夜直有西苑之直有扈從之直凡日直者入夜直者始退夜直亦然日直可四人若員多則更三番少僅二番夜直例用俸淺者十人更直駕在宮則二人直赴西苑則一人直西苑之直以二人併直五晝夜接直者至乃退扈從之直若巡行祭陵舍人一人從其車馬之費合而資給焉以上特言漢員若滿員又不同夜直則票簽房本房雖有日直不甚更番凡各房可數十許人苑直更番併侍讀往扈從職掌亦多于漢員

閣中自票擬所降旨外王言之不以時下者曰諭唐虞之咨嗟命官周漢之誥詔具焉今通謂之上諭詔唯大事用之誥爲錫命五品以上之辭其五品以下曰敕雍正中開館編集七年以前上諭時已積十餘奏綸綺之富古無與比王言之不以時下者有諭有詔有誥有敕

批答與票擬事同一例今特用于內外臣之摺奏凡摺奏直達于上不由閣批示悉出御筆交部議者或否其交部之摺則自閣轉授焉批答出自御筆交部之摺則自閣出

凡摺奏之交部院議者慮其不以時覆則庶政有稽雍正初設稽察房立期會以督責之凡期會之寬迫視其職閒冗與移牒遠近令月具籍送閣候稽核閣臣劾其玩者于月之上旬以聞焉部議不以時覆內閣因設稽察房

閣員旣日直禁廷凡陪視坐班及護日月食諸典禮悉不與亦所以慎重王言也閭員不與典禮事舍人例得與制科試自雍正癸丑後連三四科殿試多登一甲者至一甲中有二人科名爲最盛矣舍人得與

機務之繁無如雍正中。世宗念閣臣勞于八年封篆日有白金之賜。張公二萬兩。馬蔣二公各萬兩。後又錫以世爵恩至渥矣。又山海關進羨金三千兩。特命一賜閣員。于是自學士以下靡不分霑。真卽下之曠典也。閣員過額外之恩

大學士記附

鑒在官七年。凡大學士皆我所事也。念古之于爲官者。往往有記。大學士名在國史。可弗記也。茲記之者。特不忘所事之義。於其登陟所由。及封爵卒謚詳焉。有協理而未卽真者。不列入。

滿大學士七人

馬公齊。

康熙中由某官拜大學士。伯爵。以事罷。既而復位。世宗登極爲四輔臣之一。雍正中閣臣奏事列名上。

馬公爾賽。

雍正初由領侍衛內大臣拜大學士。公爵。後爲大將軍以失律謫。□。□。

孫公柱。

雍正初由尚書拜大學士。卒于位。謚。□。□。

尹公泰。

雍正中由左都御史拜額外大學士後即眞乾隆初卒于位謚□□

鄂公爾泰。

雍正中由雲貴總督拜大學士常兼兵部尚書事以總督時征烏蒙功賜伯爵後以病解今上登極召復于位爲總理輔臣乾隆中命兼翰林院學士尋卒于位謚文端追世宗遺詔配享廟廷

邁公柱。

雍正末由湖廣總督拜大學士乾隆初卒于位謚□□

查公郎阿。

雍正中由大將軍吏部尚書遞拜大學士罷大將軍又爲川陝總督乾隆初始入閣見居位

漢大學士六人

朱公軾。

雍正初由尚書拜大學士奉使京畿營田後丁內艱命居京師不治事以營田事不敷罷職又命視斷之海塘今上登極在道召還爲副總理輔臣復任閣事乾隆初卒于位謚文正

張公廷玉。

雍正初由尚書拜大學士兼戶部尚書及翰林掌院學士後常兼吏部今上登極爲總理輔臣兩朝再以勞績世爵併爲伯爵見居位

蔣公廷錫。

尚書事中由尚書拜大學士常兼戶部

陳公元龍

正中由尚書拜額外大學士後即真以老乞休乾隆初卒謚文簡

嵇公曾筠

雍正中由吏部尚書河道總督遂拜大學士後移督浙江乾隆初卒子任謚□□

徐公本

副雍正中由尚書邦協辦大學士已而即真以病解見居家極爲



冬官旁求

辛紹業著

冬官旁求

本館據豫章叢書  
本影印初編各叢  
書僅有此本

昔王氏昭明作冬官補義錢氏艸李氏文炤繼之錢作  
冬官補亡李作周禮集傳皆旁搜傳記以補冬官之闕  
王氏補十八官錢氏補二十一官李氏補三十五官錢  
氏所補十一官爲李氏所未載而於司空不立大小之  
名李氏於大司空小司空冢人權人都司空家司空不  
言所據亦未爲詳盡先生此書凡補五十三官援經据  
傳各疏所出較三家實爲精審原刻甚精阮齋所藏余  
暇鈔庋篋有年厯覽藏書家罕覲其貳蓋流傳希矣爰  
校而重刻之光緒十有九年四月新建後學陶福履



冬官旁求卷上

萬載 辛紹業 穎干 著

謹案漢書藝文志云周官經六篇師古曰卽今之周官禮也亡其冬官呂考工記充之陸德明敘錄曰河閒獻王開獻書之路時有李氏上周官五篇失事官一篇乃購千金不得取考工記呂補之是則五官全而冬官本缺非因錯亂糅合而致然也自臨川俞壽翁判爲雜出五官之說取五職之近于事典者改入冬官而各官復有移易以爲周官

之全在是嗣後永嘉王氏臨川吳氏清源邱氏叔  
邱何氏與夫方正學舒國裳陳鳳梧諸人紛紛割  
補而五官之文乃遂大亂夫冬官雖亡而自有其  
不亡者不當于五官求之也經傳所載官名非五  
官所有者甚多案其職事往往于事典有合而司  
空之職散見諸書者雖非周禮之文當亦不甚相  
異卽其所掌以考諸職如內貫弗因備錄其文叅  
之註解附昌管案而事官之屬十可八九得矣至  
于官名非五官所有而不可指爲冬官者附論於

後其名與周官小異而職不異者槩略焉益以見  
缺佚之可惜而壽翁之說之洵非然也萬載辛紹  
業

大司空

鄭康成冬官目錄云象冬所太官也是官名司空者  
冬閉藏萬物天子大司空使掌邦事亦所以富國家  
使民無空者也

班固白虎通云司空主土不言土言空者空尙主之  
何況于實以微見著

馬融洪範注云司空主空土目居民

案已上三條論司空名義天下之有皆生于無實  
皆成于虛四時之冬積于空虛不用之地而歲功  
由是而成貞元目之而伏是不用者乃所目爲用  
也司空所掌如營建造立等事皆于農閒爲宜故  
其官爲冬官然必國家之興事有常而後四民之  
赴功不懈四民之赴功不懈而後財用之源流日  
廣故主乎空者乃所以使民無空也目使民無空  
者而謂之爲司空亦如以治亂之臣而稱之爲亂

臣也班云主土馬云空土居民雖亦事典之一然偏而不能該矣故司空名義漢儒之說當㠯鄭氏

爲準

空讀平聲  
不讀去聲

又案顏師古漢書百官公卿裏注云空穴也古人穴居主穿土爲穴㠯居人也考上古穴居之時未必大有司空之官至黃帝堯舜已易穴居爲宮室矣堯之時上者爲巢下者爲營窟偶因洪水汎濫而然不必爲營窟者而大官而周大王陶復陶穴亦㠯竈于戎狄故耳非其時未知爲宮室也厥

後廼召司空正大室家營宗廟之事師古說非且  
空讀平聲今云空穴也是讀空爲孔尤非

天官小宰以官府之六屬舉邦治六曰冬官其屬六  
十掌邦事大事則從其長小事則專達

天官大宰掌建邦之六典以佐王治邦國六曰事典  
以富邦國以任百官以生萬民注云任猶俾也生猶  
養也疏云任謂任使注云任猶傳也者傳猶大也東  
齊人物大地中爲傳欲使百官皆大其功也云生猶  
養也者若直云生萬民則諸官皆生萬民彼何異也

于義不安故轉爲養冬官主土地所以養民故也  
天官小宰以官府之六職辨邦治六曰事職以富邦  
國以養萬民以生百物疏云上事典以生萬民生卽  
養也與上同此不云官府百官與六典不同者以六  
職皆當職行事義不及遠故與六典文異也

大戴記盛德篇古之御政以治天下者冢宰之官目  
成道司徒之官以成德宗伯之官以成仁司馬之官  
以成聖司寇之官以成義司空之官以成禮注云天  
道發施故爲道地理含藏故主德道德者包五性內

外之稱也天地之官尊故總焉聖通也夏氣物充達  
又征伐者所目平通天下司空不主智者已兼司馬  
凡宗社之設城郭之度宮室之量輿服之制皆冬官  
所職也

按禮非事不大故云成禮凡宗社城郭等事春官  
典命所掌大小高卑多寡之制司空因而成之非  
兼司馬之謂也

又云以之道則國治以之德則國安以之仁則國和  
以之聖則國平以之義則國成以之禮則國定注云

體國經野事官之職

又云百度不審大事失禮財物失量曰貧也貧則飭  
司空注云凡度量財物考工猶有其事

案家語執轡篇與此篇所言同此段多都鄙不修  
句

書洪範三八政四曰司空鄭云此數本諸其職先後  
之宜也司空掌居民之官傳云主空土以居民疏云  
足衣食祭鬼神必當有所安居司空主居民故司  
空爲四此用于民緩急而爲次也鄭云食貨祀賓師

皆官卽如鄭說自可皆舉官名何獨三事舉官也且司馬在上司空在下今司空在四司馬在八非取職之先後也

案疏駁鄭注取職之先後爲非今考鄭義本之大傳大傳解此節云食者萬物之始人事之所本也故先食然則貨㠯利民用故次於食民食用旣足由是致力於神故祀次於貨論語亦云所重民食喪祭也人神各有依居故司空次四民飽食安居則當教之故司徒次五先教而後刑故司寇次六

懷德畏威遠人來賓故賓次七其有不服化者則  
六師征之故兵終焉所云先後之宜者如此則仍  
就施政之宜而言非謂司空居司馬之上也至八  
者鄭謂官職則目有政必有官疏必目鄭爲非亦  
非

晉語悼公卽位知右行辛之能目數宣物定功也使  
爲司空解云數計也宣明也物事也能目計數明事  
定功故使爲司空司空掌邦事謂建都邑起宮室經  
封洫之屬

鄭康成考工記注云司空掌營城郭建都邑大社稷宗廟造宮室車服器械監百工者疏云於此下文見有其事案匠人云營國方九里國中九緯城隅之等是營城郭郡城之制及井方一里之等是營都邑左祖右社是營社稷宗廟夏后氏世室殷人重屋之等是營宮室也車人云羊車柏車是營車也繪畫之事是營服也梓人陶人之等是營禮樂之器也冶氏矢人弓人之等是營械械卽兵器也

案鄭注掌營城郭至監百工者皆釋司空之職監

百工如月令所云百工咸理監工日號是也此疏  
下文目監百工者聯唐虞已上曰共工言之誤矣  
又案已上九條總論司空之職

古文周官司空掌邦土居四民時地利傳云冬官卿  
主國空土以居民士農工商四人使順天時分地利  
授之土疏云周禮冬官亡小宰職云六曰冬官掌邦  
事又云六曰事職目富邦國目養萬民馬融云事職  
掌百工器用耒耜弓車之屬與此主土居民全不相  
當冬官既亡不知其本禮記王制記司空之事云量

地以制邑度地以居民足明冬官本有主土居民之事也齊語云管仲制法令士農工商四民不雜卽此居民使順天時分地利授之土也周禮云事此云土者爲下有居四民故云土目居民爲急故也

案古文周官出自東晉之世與周禮所言自不能相合其所云掌邦土雖亦司空之職然偏于一端不可目是該事官之全也

昭十七年左傳鄭子論官曰鴈鳩氏司空也集解云鳴鳩平均故爲司空平水土

書舜典有能奮庸熙帝之載使宅百揆僉曰伯禹作  
司空帝曰俞咨禹女平水土惟時懋哉傳云稱禹前  
功目命之疏云禹平水土從前之事嫌其今復命之  
令平水土故云稱禹前功目命之

案文十八季左傳云舜臣堯舉八愷使主后土集  
解云后土地官禹作司空平水土卽土地之官此  
云地官目其所掌而言非周官之地官也

定四季左傳封康叔于殷墟聃季授土陶叔授民集  
解云聃季周公弟司空陶叔司徒

案聘季爲司空見此傳下文

襄二十五年左傳鄭入陳子美入數俘而出祝祓社司徒致民司馬致節司空致地乃還集解云子美子產也陳亂故正其眾官修其所職曰安定之乃還疏云陳國旣亂致使官司廢闕民人分散符節失亡故令陳之司徒招致民人司馬集致符節司空檢致土地使各依其舊師乃迴還也

家語相魯篇孔子仕魯二年定公曰爲司空乃別五土之性而物各得其所生之宜咸得厥所注云五土

之性一曰山林二曰川澤三曰邱陵四曰墳衍五曰  
遯隰所生之物各得其宜

案已上六條司空掌土地之事

又案地官大司徒職云掌建邦之土地之圖注云  
若今司空郡國輿地圖漢司空有輿地圖周司空  
亦必有之司徒之圖㠯知地域廣輪之數㠯辨五  
土之名物司空之圖㠯別山川谿谷之不可處與  
休地之宜居民者皆職之不可無者也

禮王制司空執度度地居民山川沮澤時四時量地

遠近興事任力凡使民任老者之事食壯者之食注  
云度丈尺也沮謂萊沛事謂築邑廬宿市也釋文云  
何氏云草所生曰萊水所生曰沛疏云上云用民之  
力惟三日而已故注云治宮室城郭道渠此言興事  
言興則用力難重故云事謂築邑築邑則築城也又  
築廬之與宿及市案遺人云凡國野之道十里有廬  
三十里有宿五十里有市是也

又云凡居民材必因天地寒煖燥溼廣谷大川異制  
民生其間者異俗剛柔輕重遲速異齊五味異和器

械異制衣服異宜修其教不易其俗齊其政不易其  
宜中國戎夷五方之民皆有性也不可推移東方曰  
夷被髮文身有不火食者矣南方曰蠻雕題交趾有  
不火食者矣西方曰戎被髮衣皮有不粒食者矣北  
方曰狄衣羽毛穴居有不粒食者矣中國夷蠻戎狄  
皆有安居和味宜服利用備器五方之民言語不通  
嗜欲不同違其志通其欲東方曰寄南方曰象西方  
曰狄鞮北方曰譯註云廣谷大川異制謂其形象  
又云凡居民量地目制邑度地目居民地邑民居必

參相得也無曠土無游民食節事時民咸安其居樂事勸功尊君親上然後興學注云得猶足也

大戴記千乘篇司空司冬呂制度制地事準揆山林規袤衍沃畜水行衰灌浸呂節四時之事治地遠近呂任民力呂節民食大古食壯之食攻老之事

案灌浸之濯當作灌灌廣韻訓澆蓄水行衰灌浸謂蓄水呂備田用潦則行而衰之旱則灌而浸之此所呂節四時之事也濯說文訓滌義與此無涉又云是故立民之居必于中國之休地因寒暑之和

六畜育焉五穀宜焉辨輕重制剛柔和五味呂節食  
時事東辟之民曰夷精呂饒至于大遠有不火食者  
矣南辟之民曰蠻信呂朴至于大遠有不火食者矣  
西辟之民曰戎勁呂剛至于大遠有不火食者矣北  
辟之民曰狄肥呂戾至于大遠有不火食者矣及中  
國之民曰五方之民咸有安居和味咸有實用利器  
知通之信令之及量地度居有城郭立朝市地呂度  
邑邑呂度民呂觀安危距封後利先慮久固依固可  
守爲奧可久能節四時之事霜露時降方冬三月草

木落庶虞藏五穀畢入于倉子時有事蒸于皇祖皇考息國老六人㠯成冬事

案廣韻云休美也善也休地謂美善之地僥說文玉篇俱訓僬僥短人但僬僥南方非東夷集韻云僥僥也文獻通考稱高句麗潔淨自憲又云性多詭伏潔淨故精詭伏則僥東夷之國高句麗爲大記或指此也實說文訓富實用謂富足之用距當作距距說文云雞距也義不通距說文云止也距封後利謂定其四封所止而後謀所㠯利之先慮

久固謂先爲之慮其可久固之道下文云依固可  
守爲奧可久是也奧說文云宛也臣錯曰宛深也  
冬屬水水數六故息國老六人

又案已上五條司空居民之事

地官鄉師大役則帥民徒而至治其政令旣役則受  
州里之役要目考司空之辟目逆其役事注云役要  
所遣民徒之數辟功作章程逆猶鉤考也疏云言大  
役者謂築作隄防城郭等大役使其民

秋官大司寇凡萬民之有罪過而未麗于法而害于

州里者桎梏而坐諸嘉石役諸司空重罪旬有三日坐暮役其次九日坐九月役其次七日坐七月役其次五日坐五月役其下罪三日坐三月役注云役諸司空坐日訖使給百工之役也

案此二條司空主役之事

隱六年左傳宋呂武公廢司空集解云武公名司空廢爲司城

莊二十六年左傳晉士蒼爲大司空夏士蒼城絳邑深其宮

案此二條則城築之事司空所掌也

又案莊二十九季冬十有二月城諸及防左傳云書時也凡土功龍見而畢務戒事也火見而致用  
水昏正而栽日至而畢集解云龍星角亢晨見東方謂今九月周十一月定星昏而中謂今十月據傳所云則古者築作之期早不越今十月遲不過今十二月此所㠭無防農事也

襄三十一季左傳子產毀晉垣曰文公之爲盟主也  
司空㠭時平易道路

周語單襄公引周秩官云敵國賓至司空視塗視險易也  
秩官周常官篇名視塗視險易也

案此二條則道塗之事司空所掌也

又案語云雨畢而除道水涸而成梁故夏令曰九月除道十月成梁是則除道之期先于城築蓋目道路事易畢故無防界早耳

禮用令季春命司空曰時雨將降下水上謄循行國邑周視原野脩利隄防道達溝瀆開通道路毋有障塞注云古者溝上有路疏云旣爲雨決水而云開通

道路恐道路非決之物故云溝上有路言道達溝瀆  
之時須修此溝上道路案周禮遂人職云溝上有畛  
川上有路此言溝上有路者是道路之總名與彼別  
也

伏生大傳云溝瀆雍過水爲民害責之司空

案此二條則隄防溝瀆之事司空所掌也

周語虢文公論藉田曰稷乃命其旅曰徇后稷三之  
司空四之解云司空主道路溝洫故次后稷

案此條則農事司空所兼及也

詩縣五章乃召司空乃召司徒俾立室家其繩則直縮版曰載作廟翼翼傳云君子將營宮室宗廟爲先廐庫爲次居室爲後箋云司空掌營國邑司徒掌徒役之事故召之使立室家之位處繩者營其廣輪方正之制也旣正則曰索縮其築版上下相承而起廟成則嚴顯翼翼然疏云伏處者卽匠人所謂左祖右社面朝後市之類是也

又七章迺立臯門臯門有伉迺立應門應門將將迺立冢土戎醜攸行傳云王之郭門曰臯門伉高貌王

之正門曰應門將將嚴正也冢土大社也起大事動  
大衆必先有事乎社而後出謂之宜

案此二條則宗廟宮室社稷之造立皆司空所掌  
也

又案周語云清風至而修城郭宮室解云火見之  
後建亥之初也據此宮室與城郭竝修疑大促迫  
考豳詩云十月納禾稼嗟我農夫我稼旣同上入  
執宮功又鄘詩云定之方中作于楚宮揆之目日  
作于楚室則古者宮室之修例于十月無疑

周語司空除壇于藉解云司空掌地也

案此條則壇墻之事司空所掌也

家語相魯篇孔子仕魯爲司空先時季氏葬昭公于  
墓道之南孔子溝而合諸墓焉

案此條則冢墓之事司空亦兼掌之左傳呂此爲  
夫子作司寇時事考司寇無掌墓之文而役政主  
于司空家語此條但爲可信所以左傳仍不誤者  
諸侯之卿司寇與司空同職孔子是時雖進爲司  
寇必仍兼司空之事故得溝先君之墓也

天官小宰六聯注云鄭司農云大祭祀大宰贊玉幣  
司徒奉牛牲宗伯視滌濯涖玉鬯省牲鑊奉玉壺司  
馬羞魚牲奉馬牲司寇奉明水火某謂奉牲者其司  
空奉豕歟

案此條祭祀司空所掌之事

秋官大司寇凡邦之大盟約涖其盟書而登之于天  
府大史內史司會及六官皆受其貳而藏之疏云大  
盟約謂王與諸侯因大會同而與盟所有約誓之辭  
大史內史司會掌事皆與六卿同故皆有副貳盟辭

而藏之擬相勘當

案此條會盟司空所同掌之事殼梁隱二年公會  
戎于潛傳云知者慮義者行仁者守有此三者然  
後可昌出會疏云知者慮謂卿爲司徒義者行謂  
卿爲司馬仁者守謂卿爲司空人君之行二卿從  
一卿守然則人君出會司空但居守而後更藏其  
盟書之貳歟

書母誓王曰御事司徒司馬司空傳云治事三卿司  
徒主民司馬主兵司空主土指誓戰者疏云孔以于

時已稱王而有六師亦應已置六卿今呼治事惟三  
卿者司徒主民治徒庶之政令司馬主兵治軍旅之  
誓戒司空主土治壘壁曰營軍是其誓戰者故不及  
大宰大宗司寇也

案此條軍旅司空所掌之事

昭四年左傳叔孫豹卒季孫使杜洩舍路不可曰夫  
子受命於朝而賜於王王思舊勳而賜之路復命而  
致之君君不敢逆王命而復賜之使三官書之吾子  
爲司徒實書名夫子爲司馬與工正書服孟孫爲司

空呂書勳今死而弗呂是棄君命也乃使呂壅疏云  
所呂司徒書名者周禮大司徒掌十二敎十有一曰  
呂賢制爵十有二曰呂庸制祿故司徒書名定位號  
也司馬與工正書服者周禮夏官司馬其屬有司士  
掌羣臣之政呂德詔爵呂功詔祿工正雖不屬司馬  
掌作車服故與司馬書服也案周禮司勳屬夏官今  
司空書勳者春秋之時又是諸侯之法不可盡與禮

同

案此條司空書勳之事注謂春秋諸侯之法不與

禮同非也古人之有德善功烈勳勞慶賞聲名列于天下者論撰爲銘而施于鐘鼎故春秋傳季武子呂所得于齊之兵作林鐘而銘魯功而禮記亦載衛孔悝之鼎銘鐘鼎之作掌于工官則功勳之實必書于司空此真周官之法也所以司空書勳而貢官之屬又有司勳者周官聯事最多卽如司馬書服而工正亦書之是也且司勳職明云大功司勳藏其貳則書之者必不止一人矣

禮王制司會呂歲之成質于天子冢宰齊戒受質大

樂正大司寇市三官目其成從質于天子大司徒大  
司馬大司空齊戒受質百官各目其成質于三官大  
司徒大司馬大司空目百官之成質于天子百官齊  
戒受質疏云司會總主羣官治要故目一歲治要之  
成質于天子質平也謂奏上文簿聽天子平量之冢  
宰是貳王治事故亦齊戒質王受羣官所平之事謂  
共王論定也大樂正大司寇市三官以其成從質于  
天子者謂此三官各目其當司成要隨從司會平于  
天子目周灋言之司會總主羣官簿書則司徒司馬

司空簿書亦司會掌之質于天子所臣下文司徒司  
馬司空各質于天子不由司會惟大樂正大司寇市  
三官從司會質于天子者司會總主治要先質于王  
若今先申賑目樂正司寇司市當司事少卽徑從司  
會以質于王其司徒司馬司空總主萬民其事旣大  
雖司會進其治要仍須各受質屬官親自質于天子  
百官齊戒受質呂司徒司馬司空質于天子天子平  
斷畢當須報于下故在下百官齊戒受天子所平之  
要

案五官各有歲會之事據此條司空之有歲會可見矣

地官序官鄉老二鄉則公一人疏云書傳云天子三公一曰司徒公二曰司馬公三曰司空公彼注云周禮天子六卿與大宰司徒同職者則謂之司徒公與宗伯司馬同職者則謂之司馬公與司寇司空同職者則謂之司空公一公兼二卿舉下目爲稱

書顧命乃同召大保奭芮伯彤伯畢公衛侯毛公傳云大保畢毛稱公則三公矣此先後六卿次弟冢宰

第一召公領之司徒弟二芮伯爲之宗伯弟三邢伯爲之司馬第四畢公領之司寇弟五衛侯爲之司空弟六毛公領之召芮彤畢衛毛皆國名入爲天子公卿疏云衛侯爲司寇而位弟五知此先後是六卿次弟也高官兼攝下司者漢世自來謂之爲領故言召公領之畢公領之毛公領之

班固白虎通云司馬主兵司徒主人司空主地王者受命爲天地人之職故分職以置三公各主其一召公領之

又引別名記曰司徒典民司空主地司馬順天  
案此四條王朝司空所加之職漢世猶曰大司徒  
大司馬大司空稱三公蓋倣乎古也

禮王制大國三卿皆命于天子次國三卿二卿命于  
天子一卿命于其君小國二卿皆命于其君注云小  
國亦三卿一卿命于天子二卿命于其君此文侶脫  
誤耳或者欲見畿內之國二卿與疏云崔氏云三卿  
者謂大司徒兼冢宰之事大司馬兼宗伯之事大司  
空兼司寇之事故春秋左傳云季孫爲司徒叔孫爲

司馬孟孫爲司空此是三卿也

案夏官大司馬職云大國三軍次國二軍小國一軍軍將皆命卿然則國之大小目命卿之多寡爲次其同爲三卿則一鄭說是也

書立政司徒司馬司空亞旅傳云此有三卿及次卿衆大夫則是文武未伐紂特舉文武之初目爲灋則又酒誥矧惟若疇圻父薄違農父若保宏父傳云圻父司馬農父司徒身事且宜敬慎况所順疇咨之司馬乎况能追迴萬民之司徒乎宏大也宏父司空當

順安之司馬司徒司空列國諸侯三卿疏云司馬主  
封圻故云圻父司徒致民五土之穀故言農父司空  
言大父者㠯營造爲廣大國家之父

案小雅祈父疏引鄭此注云順壽萬民之圻父是  
今文尙書本作若壽據文勢三句一例當釋云順  
壽萬民之司馬迫迴萬民之司徒順安萬民之司  
空乃順傳㠯若疇爲所順疇咨㠯若保爲當順安  
之非是

又梓材司徒司馬司空尹旅曰予罔厲殺人傳云言

國之三卿正官衆大夫皆順典常而曰我無厲虐殺人之事如此則善矣

隱二年左傳司空無駭入極費廩父勝之集解云魯司徒司馬司空皆卿也

莊二十六季左傳晉士蔿爲大司空集解云大司空卿官疏云傳于比季目來說士蔣爲獻公設計晉國呂安今又言大司空明任呂卿佐也直言司空者是大夫卽司空亞旅皆受一命之服是也晉自文公呂後世爲盟主征伐諸國卿呂軍將爲名司空非復卿

官故文二季司空士穀非卿也雖則非卿職掌不異成十八季傳曰右行辛爲司空使修土蕡之法是其典事同也

公羊襄十一季作三軍傳云三軍者何三卿也作三軍何目書譏何譏耳古者上卿下卿上士下士註云說古制司馬官數古者諸侯有司徒司空上卿各一下卿各二司馬事省上下卿各一上士相上卿下士相下卿足目爲治疏云公羊目爲王官之伯宜半天子乃有三軍魯爲州牧但合二軍魯人前此止置司

徒司空目爲將下各有小卿二人輔助其政其司馬事省蓋總監而已故但有一小卿輔之今更置中軍司馬將之亦置一小卿輔助其政也

案左傳疏云閼宮頌僖公能復周公之宇云公徒三萬鄭謂大國三軍合三萬七千五百人言三萬者舉成數也川僖公復古制亦三軍矣蓋自文公以來伯主之令軍多則貢事多自減爲二軍耳非是魯眾不滿三軍也若然昭五年舍中軍書之于經徃前若減一軍亦應書之而經不書者作三軍

與舍中軍皆是變故改常卑弱公室故史特書之耳此說魯本有三軍與公羊異今更有可證者天子六軍出于六鄉諸侯三軍出于三鄉柴誓云魯人三郊三遂峙乃芻茭則當時已是三軍公羊謂魯但合一軍非也

又案已上七條侯國司空之職

鄭康成考工記注云司空唐虞已上曰共工疏云大史公楚世家云共工作亂帝使重黎誅之又案舜典云帝曰疇若予工僉曰垂哉帝曰俞咨垂女共工是

唐虞已上曰共工也若然唐虞已上皆曰共工堯時  
暫爲司空是㠭尙書舜典二十八載後各四岳欲置  
百揆僉曰伯禹作司空注云初堯時冬官爲共工舜  
舉禹治水堯知有強法必有成功改命司空㠭官異  
之禹登百揆後更名共工是其事也

案後人名司空曰工部蓋本諸此

禮曲禮天子之五官曰司徒司馬司空司士司寇典  
司五衆注云衆謂羣臣也此亦殷時制也疏云鄭注  
大傳夏書云所謂六卿者后稷司徒秩宗司馬作士

共工也而不說殷家六卿之名今此記所言上非夏法下異周典鄭唯指爲殷禮也然天官目下殷家六卿何者大宰司徒司馬司空司士司寇是也但周六六卿放天地四時而殷六卿所法則有異也殷目大宰爲一卿目象天時司空目下五卿法于地事又鄭志云司徒目下法五行也

案已上二條歷代司空官名之異

又案書序云咎單作明居疏引馬融云咎單爲湯司空史記殷本紀集解引其下文云明居明居民

之法也殷時旣有是書司空之職必盡載于篇中  
惜其書亾不可得見也

### 小司空

天官大宰乃施灋于官府而建其正大其貳設其考  
陳其殷置其輔注云正謂冢宰司徒宗伯司馬司寇  
司空也貳謂小宰小司徒小宗伯小司馬小司寇小  
司空也

案五官之長皆卿一人貳皆中大夫二人考皆下  
大夫四人其下更有上士八人中士十有六人旅

下士三十有二人府六人史十有二人胥十有二人徒百有二十人唯夏官史胥徒獨多者疏云大司馬大總六軍軍事尙嚴特須監察故也今冬官事嚴不如夏官則其人數應亦同彼四官也

禮王制大國次國小國皆下大夫五人疏云崔氏云下大夫五人者謂司徒之下置小卿一人一是小宰一是小司徒司空之下亦置二小卿一是小司寇一是小司空也司馬之下惟置一小卿小司馬也成二年左傳公會晉師于上鄭賜三帥先路三命之

服司馬司空輿帥侯正亞旅皆受一命之服疏云典  
命公之孤四命其卿三命其大夫再命其士一命侯  
之卿大夫士亦如之此三帥皆卿也本國三命故魯  
賜呂三命之服司馬司空輿帥侯正亞旅皆大夫本  
國一命故皆受一命之服周禮大夫再命此司馬司  
空等皆一命者春秋之時其事已異于周禮故大夫  
一命

案高誘云司馬司空軍司馬軍司空也據此則夏  
官之考爲軍司馬但冬官之考亦當爲軍司空其

實非也司馬主軍政故其下有軍司馬之官司空  
主事何緣特立軍司空之官乎若目爲一時假立  
則當事立之事畢則已又何由受一命之服乎當  
指小司馬小司空爲是

匠師

地官鄉師大喪及葬執翫目與匠師御匱而治役及  
窆執斧目涖匠師注云匠師事官之屬其于司空若  
鄉師之于司徒也鄉師主役匠師主眾匠共主葬引  
鄭司農云翻羽葆幢也爾雅曰翫翫也目指麾輓枢

之役正其行列進退匠師又主豐碑之事執斧臯蒞  
之使戒其事鄭司農曰窆謂葬下棺也春秋傳曰日  
中而壘禮記所謂封者蒞謂臨視也疏云地官之考  
稱鄉師春官之考稱肆師秋官之考稱士師唯有天  
官之考稱宰夫夏官之考稱軍司馬自外皆稱師此  
經鄉師是司徒考明匠師亦是司空考天子六繡千  
人輓之柩車恐傾側執翻者指麾輓柩之役人使柩  
車令不得傾側又千人輓柩臯持六繡恐行列進退  
失所皆臯翻指麾之故云正其行列進退也豐碑者

案檀弓云公室視豐碑鄭彼注云天子斷大木爲之  
豐大也天子六綽四碑前後各一碑各重鹿盧兩畔  
各一碑皆單鹿盧天子千人分置于六綽皆背碑負  
引擎鼓呂爲縱舍之節匠師主當之故云匠師主豐  
碑之事也鄉師執斧呂涖之者恐匠師不戒其事須  
有用斧之處故執斧助之使匠師戒其事

襄四季左傳定姒薨不殯于廟無櫬不虞匠慶謂季  
文子曰子爲正卿而小君之喪不成不終君也君長  
誰受其咎初季孫爲已樹六檻于蒲圃東門之外匠

慶請木季孫曰略匠慶用蒲圃之櫧季孫不御集解  
云楨親身棺匠慶大夫不㠭道取爲略御止也

禮檀弓季康子之母死公輸若方小斂般請㠭機封  
注云公輸若匠師方小言季尚幼未知禮也

案考工記匠人掌營國都廟社城郭道涂溝洫匠  
師旣爲其長必于數事有特重之職此數條但及  
堦事乃其職之一耳非匠師之所掌專于此也  
又案營國都等職乃司空度地居民之事事之大  
者匠師旣專掌之則其爲司空之考無疑

魯語嚴公丹桓宮之檻而刻其桷匠師慶諫公曰弗聽解云匠師慶掌匠大夫御孫之名也

案內傳事見莊公二十四季諫公者自是御孫非匠慶也匠慶見襄公四季若目爲一人則能爲匠師而諫君季至少亦不下二十餘歲自莊二十四季襄四年凡百有二季合匠慶已前之季當百有二十餘歲古者大夫七十而致仕豈有百二十餘歲而猶爲匠師者若目爲一人則前後同名又同爲匠師亦未必有此此國語之誤韋昭附會爲一

人非也

匠人

禮雜記升正柩諸侯執綽五百人四綽皆銜枚司馬執鐸左八人右八人匠人執羽葆御柩注云升正柩者謂將葬朝于祖正棺于廟也五百人謂一黨之民疏云匠人工人也羽葆者呂鳥羽注于柄頭如蓋謂之羽葆葆謂蓋也匠人主宮室故執蓋物御柩謂執葆羽居柩前御行于道示指揮柩于路爲進止之節也然周禮喪祝御柩此云匠人者周禮王禮此諸侯

禮也

儀禮士喪禮既井樽主人西拜工左還樽反哭獻材于殯門外主人徧視之如哭樽獻素獻成亦如之注云旣已也匠人爲樽刊治其材㠭井構于殯門外也獻材明器之材視之亦拜工左還形法定爲素飾治畢爲成疏云注云匠人爲樽刊治其材者此解經主人拜工之事㠭其冬官主百工百工之内匠人主木工之事所云者拜匠人㠭其爲樽刊治其材者有功故主人拜之也

又旣夕記旣正柩賓出遂匠納車于階聞註云遂匠  
遂人匠人也遂人主引徒役匠人主載柩奚職相左  
右也車載柩車疏云周禮有遂人匠人天子之官士  
雖無臣亦有遂人匠人主其葬事

案諸侯及士之禮雖降于王朝其設官分職亦必  
依王朝而爲之故考工記有匠人而此各有之匠  
人之職其大者見于考工記此但就其共葬事而  
言耳

又案匠師爲冬官之考爵下大夫則匠人上士也

司商

周語仲山甫諫宣王曰古者不料民而知其多少司民協孤終司商協名姓司徒協旅司寇協姦牧協職工協革場協入廩協出解云料數也司民掌登萬民之數協合也終死也司商掌賜族受姓之官商金聲清謂人始生吹律合之定其姓名司徒掌合師旅之眾司寇掌合姦民呂知死刑之數牧人掌牧養犧牲合其物色之數工百工之官革更也更制度者合其數也場人掌場圃委積之珍物斂而藏之廩人掌九

穀出用之數

案此所數司民司徒司寇牧人場人廩人皆周官則司商亦必周官司商掌辨族姓居四民之職也商說文云從外知內也从商章省聲漢書律志云商之爲言章也物成熟可章度司商名義謂度其族姓而章明之非吹律之謂吹律何但取商聲且商聲次濁云金聲清亦非

又案司商與司民對舉周禮司民中士六人司商之爵或亦中士歟

勤人

正長

逸周書大聚解立勤人以職孤大正長目順幼大職  
喪目恤死大葬目正同

案勤人正長之所掌乃居民之事亦冬官之屬也  
職喪見春官大葬卽墓大夫亦見春官所云正同  
卽彼職云令國民族葬正其位之事

司里

周語單襄公引周秩官云敵國賓至司里授館解云

司里授客所當館次于卿也聘禮賓致館

案司里掌國中之宅凡敵國賓至必館于國中故  
司里授之

魯語文公欲弛孟文子之宅使謂之曰吾欲利予于  
外之寬者對曰臣大先臣之署服其車服爲利故而  
易其次是辱君命也不敢聞命若罪也則請納祿與  
車服而違署唯里人之所命次公弗取公欲弛郈敬  
子之宅對曰先臣惠伯呂命于司里今命臣更次于  
外爲有司之目班命事也無乃違乎請從司徒呂班

徙次公亦弗取解云言有司曰佐次命職事于臣臣在外次無乃遠違而不便乎若有罪君欲黜之請從司徒徙里舍也

案司里掌國中之宅凡在佐者授之署黜爲民則當從民居故云從司徒曰徙次

昭三季左傳齊晏子辭宅曰敢煩里旅集解云旅衆也不敢勞衆爲已宅

案里旅謂司里之衆

襄九季左傳宋災樂喜爲司城以爲政使伯氏司里

火所未至徹小屋塗大屋陳畚揭具縛缶備水器量  
輕重蓄水潦積土塗巡丈城繕守備表火道集解云  
樂喜子罕也爲政卿伯氏宋大夫司里里宰畚箕籠  
揭土舉綆汲索缶汲器水器益鬻之屬量輕重計人  
力所任巡行也丈度也繕治也行度守備之處恐因  
災作亂火起則從其所趨標表之疏云釋言云里邑  
也李巡云里居之邑也是里爲邑居之名周禮五鄰  
爲里里五鄰必同居故里爲名里長謂之宰周禮  
里宰五里下士一人謂六遂之內二十五家之長也

此言司里謂司城內之居若今城內之坊里也里必有長不知其官之名周禮有里宰故曰宰言之非是郊外之民二十五家之長也

案樂喜爲司城而使司里撤屋具器是司里爲司空屬官可知下文華臣爲司徒而令隧正皇鄭爲司馬而命校正亦各率其屬也韋昭解國語杜預解左傳俱曰司里爲里宰疑于地官之屬此疏所說極明

周語單襄公曰其時倣曰收而場功僕而畚揭營室

之中土功其始火之初見期于司里解云時儆所  
儆告其民也收而場功使人修囷倉也倚具也畚器  
名土籠也掘昇土之器具汝畚掘將呂築作也定謂  
之營室謂建亥小雪之中定星昏正于午土功可呂  
始也期會也致其築作之具會于司里之官

案此則司里兼掌築作之事

又案春官典命公之大夫再命而康成說天子之  
上士三命中士再命下士一命中外相擬宋司里  
呂大夫爲之則王朝之司里必中士也

館人亦作管人

儀禮聘禮管人布幕于寢門外注云管猶館也  
案注謂館人掌次舍帷幕者鄭望文爲說非也管  
人掌館舍之事布幕其兼及耳

聘禮記管人爲客三日具沐五日具浴注云管人掌  
客館者也

禮喪大記管人汲不說縞屨之盡階不升堂授御者  
御者入浴又云管人汲授御者御者差沐于堂上君  
沐梁大夫沐稷士沐梁甸人爲塗于西牆下陶人出

重鬲管人受沐乃煮之甸人取所徹廟之西北薪  
用爨之管人授御者沐乃沐注云差浙也浙飯米取  
其潘吕爲沐也疏云管人主館舍者繡汲水瓶索也  
遽促于事故不說去此索但縈屈執之于中壘塹灶  
重鬲者謂懸重之饗也是瓦瓶受三升

儀禮士喪禮管人汲不說縉屨之祝淅米于堂南面  
用盆管人盡階不升堂受潘煮于塹用重鬲注云管  
人有司主館舍者不說縉將吕就祝濯米屨縈也疏  
云士旣無臣所行事者是府史故知管人是有司也

聘禮記云管人爲客具沐浴此爲死者故亦使之汲水也

昭元季左傳鄭子羽對楚伯州犁曰敝邑館人之屬也集解云館人守舍人也

禮檀弓孔子之衛遇舊館人之喪注云前日君所使舍已疏云知非舊所經過主人必自爲君所使舍已者若是經過主人當云遇舊主人之喪故禮稱皆云主人是目左傳云目爲東道主又云昔吾主于趙氏皆主人爲主今此云館人明置館舍于已故目爲君

所使舍已者孟子之滕館于上宮有業屨於牖上館人求之弗得

案上宮爲滕賓客之館則館人滕君所使守館舍有司也

又案司里通掌國宅館人事掌客館亦事官之屬也司里與于土功館人與于喪事此又其兼職司里旣爲中士則館人下士也

舌人

周語王語士季曰唯夫戎翟則有體焉夫戎狄冒没

輕儻貪而不讓其血氣不治若禽獸焉其適來班貢  
不俟齋香嘉味故坐諸門外而使舌人體委與之解  
云儻進退上下無列也適徯也班賦也舌人能達異  
方之志象胥之官也

案古人非象胥說見後

寄

象

狄鞮

譯

禮王制五方之民言語不通嗜欲不同達其志通其  
欲東方曰寄南方曰象西方曰狄鞮北方曰譯注云  
鞮之言知也今冀部有言狄鞮者疏云達其志通其  
欲者謂帝王立此傳語之人曉達五方之志通傳五  
方之欲使相領解其通傳東方之語官謂之曰寄言  
傳寄外內語言通傳南方語官謂之曰象者言放象  
外內之言其通傳西方語官謂之曰狄鞮者鞮知也  
謂通傳夷狄之語與中國相知其通傳北方語官謂  
之曰譯者譯陳也謂陳說外內之言

案秋官有象胥之官鄭云通夷狄之言者曰象胥其有才知者也此類之本名東方曰寄南方曰象西方曰狄鞮北方曰譯今總名曰象者周之德先致南方也是目四者合而爲一而韋昭又目舌人卽象胥總緣冬官早亡遂各擬議爲說也不知周官分職聯事最多象胥自是總掌四夷之官且其職云掌傳王之言而諭說焉協其禮與其辭言傳之皆行朝聘時所有之事若四官則達其志通其欲乃特爲彼而設是目各專一方而不相兼也至

舌人則又專掌其享燕之禮俱非象胥之職所能盡者司空內安中國之民則外亦安四夷之民五職屬於冬官無疑

又案象胥之長爲上士此五官其皆中下士歟



國子監助教敬堂辛君墓表

乾隆己酉予於江西選拔貢生得萬載辛君從遊南康  
廣信諸郡歲餘君成進士後官國學者又十年知其經  
學最深所與予校勘注疏說文諸條手記皆存予篋近  
年來有持經說相質者必與君共研覈之君證據極博  
而能審擇歸於一是不爲泛驚不爲矜異之說今年春  
尙爲新城魯君嗣光校定尙書說己酉江西選拔諸子  
惟魯與君治經尤精密魯君嗣光前十餘年卒予未得  
表其墓孰意今乃表君之墓可傷也已君爲人誠信篤

敬不苟言笑不輕然諾易書詩三禮三傳皆考辨補析  
凡若干卷君乾隆己酉舉於鄉乙卯中會試嘉慶丙辰  
進士國子監助教俸滿以同知用諱紹業字復先一字  
敬堂生於乾隆二十年十一月二十七日卒於嘉慶十  
九年七月十六日年六十配王孺人子四介陶僕岫孫  
三全士蓮士敏士僎庚午舉人今扶柩歸葬狀其略來  
求表於墓道雖不獲書丹於石其學行皆可傳於後者  
賜加二品銜前內閣學士鴻臚寺卿大興翁方綱撰

冬官旁求卷下

萬載 辛紹業 馥干 著

稷

書舜典帝曰弃黎民阻飢汝后稷播時百穀疏云稷  
是五穀之長大官主此稷事后訓君也帝言汝君此  
稷官布種是百穀目濟救之追美其功目勸勉之上  
文讓于稷契益稷云暨稷呂刑云稷降播種國語云  
稷爲天官單名爲稷尊而君之稱爲后稷故詩傳孝  
經皆曰后稷爲言非官稱后也

昭二十九年左傳蔡墨對魏獻子曰稷田正也疏云  
正長也稷是田官之長

案稷在虞夏爲卿官其于周時必中大夫也蔡墨  
謂之田正目其爲田官之長而稱之與後農正之  
爲官名者自別

農正亦稱農大夫

農師

周語宣王不籍千畝虢文公諫曰不可夫民之大事  
在農是故稷爲大官古者大史順時覩土先時九日

大史告稷稷呂告王乃使司徒咸戒公卿百吏庶民  
司空除壇于藉命農大夫咸戒農用及藉后稷監之  
膳夫農正陳藉禮大史贊王王敬從之王耕一撥班  
三之庶人終于干畝其后稷省功大史監之司徒省  
民大史監之是日也瞽帥音官呂省風土稷則徧戒  
百姓紀農協功乃命其旅曰徇農師一之農正再之  
后稷三之司空四之司徒五之大保六之大師七之  
大史八之宗伯九之王則大徇耨穫亦如之解云觀  
視也庶民甸師氏所掌之民主耕耨王之藉田者農

用田器也膳夫上士農正田大夫主敷陳籍禮而祭其神爲農祈也贊導也一墻一耜之墻也王無耦目一耜耕班次也三于下各三其上也王一墻公三卿九大夫二十七音官樂官也風土目音律省土風風氣和則土氣養紀猶綜理也協同也一之先筮也農師上士農正后稷之佐故次農師后稷農官之君故次農正司空主道路溝洫故次后稷司徒省民故次司空大保大師天子三公佐王論道氾監衆官不得掌事故次司徒大史掌逆官府之治故次大師宗伯

卿官掌相王之大禮若王不與祭則攝佐故次大史  
大徇率公卿大夫親行農也

案前云農大夫咸戒農用其後徇農但有農師農  
正而無農大夫故知農大夫卽農正也其爵爲大  
夫其官爲農師之長語兩稱之

昭十七季左傳鄭子論官曰九扈爲九農正扈民無  
淫者也集解云扈有九種也春扈鴻鵠夏扈竊元秋  
扈竊藍冬扈竊黃棘扈竊丹行扈喈喈胥扈噴噴桑  
扈竊脂老扈鶡鶡目九扈爲九農之號各隨其宜目

教民事扈止也止民使不淫放疏云釋鳥自春屬鶡  
鶡至宵屬噴噴凡七屬其文相次與此註正同又云  
鶡鵠老扈鶡桑扈竊脂註爾雅者舍人李巡孫炎郭  
璞皆斷老上屬扈下屬解云鶡一名鵠老鵠一名扈  
扈雀也唯樊光斷鶡鵠爲句曰老下屬注云春秋云  
九扈爲九農正九扈者春扈夏扈秋扈冬扈棘扈行  
扈宵扈桑扈老扈是曰老下屬唯鶡不重耳

案九扈之職賈逵樊光釋之其言不經難可據信  
疏駁之極是語多不具少皞氏于農官如此其煩

者農事特重也周官自稷目下可考者亦非一職無如冬官缺亾不能得其全也

田畯

春官籥章凡國祈年于田祖獻幽雅擊土鼓曰樂田  
畯注云祈季祈豐季也田祖始耕田者謂神農也幽  
雅亦七月也七月又有于耜舉趾餚彼南畝之事是  
亦歌其類謂之雅者目其言男女之正鄭司農云田  
畯古之先教田者爾雅曰畯農夫也疏云田祖卽郊  
特牲云先嗇一也故甫田詩云目御田祖毛云田祖

先嗇者也先王之業㠯農爲本是男女之正故名雅也

案主田之官謂之田畯故古之先教田者亦㠯是名之

禮郊特牲饗農及郵裹畧注云農田畯也

詩七月田畯至喜疏云此官選俊人主田故謂之田畯

案田畯名義當从此說

又甫田田畯至喜箋云田畯司嗇今之嗇夫也疏云

田畯田官在田司主稼穡故謂司嗇漢世亦有此官謂之嗇夫故言今之嗇夫也郊特牲曰蜡之祭也主先嗇而祭司嗇也注云先嗇若神農司嗇若后稷自神農始造其田后稷教民播種此二人有田事之大功者也蜡者爲田報祭故知謂此二人稷爲人臣教稼亦是由官故謂之司嗇此言田畯乃是當時主稼之人故呂司嗇言之與郊特牲名同而實異也

案嗇夫別一官非田畯也鄭雖呂漢官况之然直謂今之嗇夫誤矣

爾雅釋言畯農夫也疏云孫炎云農夫田官也

禮月令孟春天氣下降地氣上騰天地和同草木萌動王命布農事命田舍東郊皆修封疆審端經術善相邱陵阪險原隰土地所宜五穀所殖昌教道民必躬親之田事旣飭先定準直農乃不惑注云田謂田畯主農之官也術周禮作遂夫閒有遂遂上有徑遂小溝也步道曰徑準直謂封疆徑遂也

大戴記夏小正篇正月農率均田鄭康成注禮月令引之孔穎達疏云農率則田畯也均田則審端徑術

也

案小正解云率循也均田始除田也據此則本但  
曰農名之與郊特牲言饗農一例孔穎達曰農率  
連言非也此官本名田畯而或單言田或單言畯  
或更言農皆隨其便稱之

又案韋昭國語解云農大夫田畯也其解農正云  
后稷之佐田畯也幽風毛傳云田畯田大夫也皆  
曰田畯卽農正此說非也郊特牲云蜡之祭主  
先嗇而祭司嗇也注云先嗇若神農者司嗇后稷

是也疏云伊耆氏神農也神農既爲始蜡豈自祭其身目爲先嗇乎皇氏云伊耆一代總號其子孫爲天子者始爲蜡祭祭其先祖造田者故有先嗇也據此即可目神農爲先嗇不得目后稷爲司嗇司嗇必其時之助教稼者若后稷爲司嗇當在夏商之世至周而后稷又當爲先嗇司嗇則近世爲農正者旣農正爲司嗇下文舉農爲田畯何得云田畯卽農正乎目爵次推之農正爲下大夫農師爲上士田畯其中下士歟

嗇夫

儀禮覲禮嗇夫承命告于天子注云嗇夫蓋司空之屬也爲末擯承命于侯氏下介傳而上上擯呂告于天子疏云五官之內無嗇夫之名故知是司空之屬但司空職凶故言蓋呂疑之

昭十七年左傳夏六月日食大史引夏書曰辰不集于房瞽奏鼓嗇夫馳庶人走集解云逸書也疏引孔傳云嗇夫主幣之官馳取幣禮天神

案嗇夫之官鄭引况田畯謂司主稼穡者考漢書

百官公卿表云十亭一鄉鄉有嗇夫職聽訟收賦稅又後漢志補註引風俗通曰嗇者省也夫賦也言消息百姓均其役賦據此二文則周時嗇夫亦必主稅斂之官也又說文云禾在野爲稼穀可收曰稽地官司稼主稼則嗇夫主稽職乃相備若然司稼職又云呂季之上下出斂法者彼但出其灋耳此則用其灋而斂之非謂彼可兼此也至孔傳始目嗇夫爲主幣之官孔傳晉人僞作徒見左傳上文言樂奏鼓之下承目祝用幣之句遂用云然

說不可信

又案戰國策魏策云周最善齊翟強善楚二子者欲傷張儀于魏張子聞之因使其人爲見者齎夫吳師道曰見者謂引見傳命之臣儀使其臣爲見者之齎夫目閒伺之此云見者齎夫與儀禮承命告于天子相同則傳命之事齎夫所兼掌也

又案聘禮卿爲上擯大夫爲承擯士爲紹擯今此齎夫爲未擯則士也又春官序官大師下大夫二人小師上士四人下云瞽矇上瞽四十人中瞽百

人下瞽百有六十人不言其何爵即使有爵亦不過中下士及不命之士而已書目嗇夫次于瞽與庶人之間其非上士可知

保介

詩臣工嗟嗟保介維暮之春亦又何求如何新畬於皇來牟將受厥明明昭上帝迄用康季命我衆人痔乃錢鏄奄觀銍艾

禮月令孟春天子親載耒耜措之于參保介之御閒帥三公九卿諸侯大夫躬耕帝籍

案保介之名他無所見見此二處者皆耕藉之事  
康成箋注兩目爲車右衣甲之士非也介字在說  
文八部解云畫也从八从人人各有介此正画井  
分疆之義而周頌無此疆爾界陸德明所見之本  
乃作介字然則保介者正疆界之官也王將有事  
于藉田故咨嗟而命之且使之驂乘焉重其職也  
豈平時車右之士乎

郵

禮郊特牲饗農及郵表疎注云郵表疎謂田畯所目

督約百姓于井田之處也詩云爲下國畷郵疏云郵若郵亭屋宇處所裏田畔畷者謂井畔相連畷所引詩者齊魯韓詩也

孟子孔子曰德之流行速於置郵而傳命疏云郵駢名云竟上舍也又云官名督郵主諸縣罰負

案此疏駢名之下有闕文

又案爾雅釋言郵過也注云道路所經過又說文云郵竟上行書舍畷兩陌間道也廣六尺古人于田畔及國竟皆大郵舍設官目蒞之因目爲名其

職本曰分別畛域巡行民稼因而傳命從來皆使其徒掌之後世勤民之意漸微而傳命之事乃有特重故諸家所解多曰駟舍爲言也大蜡祭郵者正目其生有功于農沒得享其報鄭注但目田畯督約百姓之處爲言則田畯旣已祭之其屋宇何必更祭但田畯出而勸農或就其處暫息事應然耳

又案釋言云駟遽傳也注云皆傳車駟馬之名疏云文十六季左傳曰楚子乘駟會師于臨品又僖

三十三季云使遽告于鄭又成五季曰曹侯目傳召伯宗是皆謂今駟也駟傳之事諸國皆有則駟傳之官亦所必有至駟遽之分則李舍人云駟尊者之傳也今考左傳楚子乘駟外如襄二十一季祁奚乘駟而見宣子襄二十七季子木使驛謁諸王昭五年楚子目駟至于羅汭皆君大夫之事李說是也旣駟爲尊者之傳則遽乃卑者之傳禮記玉藻士曰傳遽之臣注云士伏卑供車馬之役故自稱傳遽是其證也又左傳遽凡三見僖三十三

季乃商人弦高之使其爲卑者無疑哀二十一年  
齊閭邱息曰羣臣將傳遞以告寡君譏公早至故  
言欲使遽告取急卑者行彌急也若昭二年子產  
乘遽則呂公孫黑作亂懼弗及故乘卑者之傳而  
至耳傳則其總名也

又案後漢督郵之官其秩甚微此饗郵亦在饗農  
之下則郵下士也

四監

亦稱田監

禮月令季夏命四監大合百縣之秩芻目養犧牲令

民無不咸出其力自共皇天上帝名山大川四方之  
神自祠宗廟社稷之靈自爲民祈福注云四監主山  
林川澤之官百縣鄉遂之屬地有山林川澤者也秩  
常也百縣給國養犧牲之芻多少有常民皆當出力  
爲艾之今月令四爲田牲自供祠神靈爲民祈福明  
使民艾芻是不虛取也疏云知百縣非諸侯而云鄉  
遂之屬自其取芻養牲不可大遠故知是畿內鄉遂  
仲夏云乃命百縣雩祀百辟卿士者兼外內諸侯也  
此云鄉遂之屬者不兼公卿大夫之采邑

又季冬乃命四監收秩薪柴自共郊廟及百祀之薪  
燎注云四監主山林川澤之官也大者可析謂之薪  
小者合束謂之柴薪施炊爨柴自給燎

案官名四監者監取四野之薪芻也甸人之薪蒸  
目役外內饔之事此之薪燎自供祭祀之用彼入  
天官則此宜入冬官又冬官之屬有職人掌畜牧  
之事則四監之秩芻乃自供職人之求也

又案甸師下士二人四監之官人數不可知其爵  
或亦下士歟

# 野虞

禮月令季春命野虞毋伐桑柘注云野虞謂主田及山林之官

又孟夏命野虞出行田原爲天子勞農勸民毋或失時又仲冬山林藪澤有能取蔬食田獵禽獸者野虞教道之其有相侵奪者罪之不赦注云務收斂野物也大澤曰藪草木之實爲蔬食疏云鄭注周禮水鍾曰澤水希曰藪今言大澤曰藪者自有水之處謂之澤旁無水之處謂之藪草木之實爲蔬食者爾雅云

蔬不熟爲饁蔬謂菜蔬曰其籠蔬經言蔬食故爲草木實也山林蔬食榛栗之屬藪澤蔬食菱芡之屬

案地官有山虞林衡之職皆掌材木之禁令者野虞則掌野物及巡田職各不同彼二職旣屬地官則此冬官之屬也

又案山虞林衡有大山大林麓中下士之分野虞未知所分若何然亦士官也

又案月令有澤人水虞之官其職主納材葦主收水泉池澤之賦則卽澤虞而所稱各異耳

又案齊有衡鹿舟鮫虞侯祈望皆主山林澤藪之  
官疏云此皆齊自大名故與周禮不相同

司鐸

昭十三季左傳同盟于平邱晉人執季孫意如曰幕  
蒙之使狄人守之司鐸射懷錦奉壺飲冰目蒲伏焉  
守者禦之乃與之錦而入集解云司鐸魯大夫蒲伏  
竊徑飲季孫冰箭箒蓋可目取飲疏云有北狄之人  
從晉師來會故使狄人守之

哀三年左傳司鐸火集解云司鐸宮名

襄十四季左傳師曠引夏書曰道人目木鐸狗于路  
官師相規工執藝事呂諫正月孟春于是乎有之諫  
失常也集解云逸書道人行人之官也木鐸木舌金  
鈴徇于路求歌謠之言疏云木鐸徇路是號令之事  
孔言宣令之官杜必呂爲行人之官者呂其云徇于  
道路故呂爲行人之官采訪歌謠者與孔宣令之官  
其事不異劉炫呂孔規杜非也

案行人之官杜亦比况言之非呂爲秋官行人之  
職也行人無用木鐸之事

尙書疏云周禮無此官惟小宰云正歲帥治官之屬而觀治象之灋徇目木鐸曰不用灋者國有常刑宣令之事略與此同此但別置其官非如周之小宰名曰道人不知其意蓋訓道爲聚聚人而令之故目爲名也禮有金鐸木鐸鐸是鈴也其體目金爲之明舌有金木之異知木鐸是木舌也周禮鼓人目金鐸通鼓大司馬教振旅兩司馬執鐸明掌伎云振木鐸于朝是武事振金鐸文事振木鐸

案魯有司鐸則周官亦當有司鐸道人者夏時異

名也其官大抵掌道路之政令而王宮警戒之令亦兼掌之觀魯司鐸之官近於公宮可知旣掌道路之政則卽司空平易道涂之職屬之冬官宜也又案司鐸于魯爲大夫于天子則士官歟

涉人

哀十五季左傳陳使弔吳公孫貞子卒吳子使辭弔尹蓋對曰苟我寡君之命達于君所雖隕于深淵則天命也非君與涉人之過也

案官呂涉人爲名必係掌津梁之官孟子云歲十

一月徒杠成十二月輿梁成正冬官之事則此職之屬於冬官明矣

蒼兕

史記齊大公世家師行師尚父誓曰蒼兕蒼兕總爾衆庶與爾舟楫後至者斬索隱曰本或作蒼雉案馬融曰蒼兕主舟楫官名

案主舟楫之官名蒼兕者必于舟首畫作兜牛之形因目名其職王充論衡目爲水獸九頭善覆人舟蕡衆令急濟故言此目懼之非也

又案車人屬於冬官則主舟楫之官屬於冬官必矣

舟牧

禮月令季春命舟牧覆舟五覆五反乃告舟備具于天子焉天子始乘舟薦鮪于寢廟乃爲麥社實注云舟牧主舟之官也覆反舟者備傾側也

魯語諸侯伐秦及涇莫濟晉叔向見叔孫穆子穆子曰豹之業及匏有苦葉矣叔向退召舟虞與司馬曰具舟除隧不共有灋解云隧道也舟虞具舟司馬除

道

案舟虞卽舟牧晉官偶異其名耳

舟人

詩小東舟人之子熊羆是裘傳云舟人舟楫之人

水師

周語單襄公引周秩官曰敵國賓至火師監燎水師監灌解云火師司火燎庭燎也水師掌水監滌濯之事者

案秋官有司烜氏注云烜火也讀如衛侯燬之燬

考說文烜在燼字下注云或从亘司燼屬夏官此  
不當更作烜作燬爲是說文又云火燬也燬火也  
二字正同解謂火師司火卽此官也又其職云凡  
邦之大事共墳燭庭燎疏謂大事若大喪紀大賓  
客則皆設大燭在門外庭燎在大寢之庭正此賓  
至監燎之事火師旣屬秋官水師必屬冬官水冬  
行也

又案司馬彪漢書禮儀志云夏日至浚井改水冬  
日至鑽燧改火周官司燼掌四時變國火卽改火

之事則改水之事水師掌之可知

又案司烜下士六人司爟下士二人水師亦必下士也

冢人

春官小宗伯毛六牲辨其名物而頒之于五官使共奉之注云鄭司農云司徒主牛宗伯主雞司馬主馬及羊司寇主犬司空主豕疏云先鄭云司徒奉牛已下皆案職知之若大司徒有牛人卽云奉牛牲宗伯職有雞人卽云供雞牲司馬職有羊人校人掌馬卽

云供羊牲奉馬牲司寇職有犬人卽云奉犬牲唯司空職亡先鄭知主豕者五行傳聽之不聰則有豕禡是豕屬北方司空冬官故奉豕牲也

案此則冬官之有豕人必矣又月令冬食彘注云彘水畜孔穎達云食當方之牲此亦豕人屬冬官之證也

又案牛大牢所用者重故其官中士二人下士四人而府史胥徒多雞小物所用者微故其官下士一人史一人徒四人而已羊少牢大所用者多故

皆下士三人犬人多一府而史賈徒陪于羊人者  
犬有守犬田犬廄犬之分羊則無也豕輕于牛而  
重于雞又不如犬之有分用則其官當以羊人爲  
準

職人

地官牛人凡祭祀其其享牛求牛以授職人而芻之  
注云享獻也獻神之牛謂所以祭者也求終也終事  
之牛謂所以繹者也職讀爲穢穢謂之弑可以繫牛  
穢人者謂牧人充人與疏云注云職讀爲穢者凡官

皆有職直云職人無所指斥但職穢聲相近誤爲職  
故讀從穢充人置穢入地之時穢穢然作聲故以聲  
名其官也云穢人者謂牧人充人與者與疑辭疑之  
者凡牲堪祭祀者則牛人選入牧人臨祭之前牧人  
乃授充人充人乃繫養之今若卽以職人爲充人則  
隔牧人故連牧人而言之明先至牧人乃至充人經  
據後而言之耳

案牧人牧牛牛人但共奉之非從牛人選入牧人  
也觀夏官羊人職云若牧人無牲則受布于司馬

使其買賣牲而共之可見若然牛人職云掌養國之公牛者牧人所牧之公牛牛人監養之非牛人別自養牛也餘見後案

春官肆師大祭祀展犧牲繫于牢頤于職人注云此職人謂充人及監門人疏云案充人云祀五帝繫于牢芻之三月凡散祭祀之牲繫于國門使養之故知棫人是此二官也此有監門人者謂兼祭諸神司中之等

案犧牲之事周禮甚重無事則牧于牧人當事則

共于牛人羊人若大祭祀之犧牲則牧人與牛人  
同共之肆師展之而使充人繫之職人芻之散祭  
祀之犧牲則監門人養之鄭謂職人卽充人考肆  
師職先言繫于牢後言頒于職人是二職不得相  
合若充人職言繫于牢芻之三月不云使職人芻  
之者文不具也至監門人養小祭祀之犧牲則又  
與肆師言大祭祀者不合而前條又兼牧人言之  
則尤遠矣所㠭充人屬地官而職人屬冬官者四  
監合秩芻屬於冬官故也

又案充人下士則職人亦下士也

史記孔子世家嘗爲司職吏而畜蕃息

案此則職不必改字

孟子孔子嘗爲乘田矣曰牛羊苗壯長而已矣

案乘田當係魯官異名

權人

論語謹權量審法度修廢官四方之政行焉注云包  
曰權秤也量斗斛疏云漢書律志云權者銖兩斤鈞  
石也所呂秤物平施知輕重也本起于黃鐘之重一

龠容千二百黍重十二銖兩之爲兩二十四銖爲兩  
十六兩爲斤三十斤爲鈞四鈞爲石五權謹矣量者  
龠合升斗斛也所目量多少也本始于黃鐘之龠用  
度數審其容目子穀秬黍中者千有二百實其龠合  
龠爲合十合爲升十升爲斗十斗爲斛而五量嘉矣  
志又云度者分寸尺丈引也所目度長短也本起黃  
鐘之長目子穀秬黍中者一黍之廣爲一分十分爲  
寸十寸爲尺十尺爲丈十丈爲引而五度審矣而此  
不言度者從可知也

禮月令仲春日夜分則同度量鈞衡石角斗甬正權  
槩注云因晝夜等而平當平也同角正皆謂平之也  
丈尺曰度斗斛曰量三十斤曰鈞稱上曰衡百二十  
斤曰石甬今斛也稱錘曰權概平斗斛者疏云漢書  
律志云權與物鈞而生衡衡運生規規圓生矩矩方  
生繩繩直生準權與物正等則衡平是權爲稱錘稱  
上曰衡甬與斗連文律志十斗爲斛故知甬則斛也  
又仲秋日夜分則同度量平權衡正鈞石角斗甬  
案權衡丈尺斗斛之事皆聖王所重缺一不可者

夏官有量人掌量度之事考工記有橐氏掌豆脯之制則必有權人掌輕重之施其官屬於冬官明矣量人下士則權人橐氏亦下士也

鉦人

詩采芑鉦人伐鼓傳云鉦目靜之鼓目動之箋云鉦也鼓也各有人焉言鉦人伐鼓互言爾疏云周禮有鎧鐸鎧鐸無鉦也說文云鉦鎧也倨鈴柄中上下通然則鉦卽鎧也鼓人云目金鎧止鼓大司馬云鳴鎧且却聞鉦而止是鉦目靜之大司馬又曰鼓人三鼓

車徒皆作聞鼓而起是鼓呂動之也說文又曰鐸鉦  
也鐸小鉦也則鐸鐸相類俱得呂鉦名之故鼓人注  
云鐸鉦也形如小鐘是鐸亦名鉦也鐸侶小鐘鐸侶  
鉦是有大小之異耳俱得名鉦但鐸呂節鼓非靜之  
義故知鉦呂靜之指謂鐸也

案鉦呂靜之宜屬冬官鼓人屬地官者彼疏云呂  
其主教六鼓四金呂是教官故在此鼓人兼教四  
金疑同一職所呂復有鉦人者彼但掌其教耳至  
其用之必于鉦人也

又案鼓人中士鉦人亞于鼓人蓋下士也

倌人

詩定中靈兩旣零命彼倌人星言夙駕說于桑田傳云倌人主駕者疏云日命之使駕故知主駕者諸侯之禮亡未知倌人爲何官也

案周官掌車之官不一而皆非主駕者典路掌五路之用說疑于主駕矣然其子駕說亦第贊之而已贊註謂贊僕與趣馬考趣馬職云掌駕說之頒但謂用馬之次第亦非主駕大馭戎僕諸職于駕

說無文而曲禮云君車將駕則僕執策太子馬前  
注云監駕且爲行馬是亦未嘗主駕主駕者倌人  
也冬官有車人目爲車則應有倌人目駕車與春  
夏諸職正相備也

又案典路目士爲之倌人或亦士歟

復陶

襄三十季左傳趙孟使絳縣老人助爲政辭目老與  
之田使爲君復陶集解云復陶主衣服之官疏云昭  
十二季傳說楚子出獵王皮冠秦復陶翠被豹舄執

鞭呂出復陶之文在冠屨之間知復陶是衣也此言  
君復陶知是主君衣服之官也衣服之名復陶其義  
未聞

案春官司服掌王之吉凶衣服辨其名物與其用  
事皆灋服也復陶別有其製必係襄服意此官專  
掌爲此遂目名之歟既復陶非法服故从其爲之  
而入工官不與司服同入禮官事之宜也

又案趙孟使絳縣老人爲政下大夫也辭而使爲  
此官則士也周官司服係中士此職亞之其下士

歟

綴衣

書大政王左右常伯常任準人綴衣虎賁

又云虎賁綴衣趣馬小尹傳云三者雖小官長必擇人又顧命茲既受命還出綴衣于庭傳云綴衣幄帳疏云下云狄設黼扆綴衣則綴衣是黼扆之類黼扆是王坐大之處知綴衣是施張于王坐之上故目爲幄帳也周禮幕人掌帷幕幄帯綏之事鄭云在旁曰帷在上曰幕帷幕皆目布爲之四合象宮室曰幄王

所居之帳也。帝王在幕居幄中坐上承塵也。幄帀皆  
呂繪爲之。然則幄帳是黼辰之上所張之物。所言出  
綴衣于庭。則亦并出黼辰故下句云。象王平生坐時  
更復設之。

又云。狄設黼辰綴衣傳云。復設幄帳。象生平所爲。  
案帷幕幄帀綴掌于幕人而此復有綴衣者。幕人  
但共其物綴而設之必別有人綴者。連綴之義。帷  
幕目連綴而成故總而名之曰綴衣。而官亦目是  
名。此官不但掌綴設必兼有所正焉。如大僕正服

达之事故在王左右也傳于顧命言幄帳而于大政言掌衣服疏承之遂呂爲卽大僕之官誤矣鄭呂顧命所出者爲連綴小斂大斂之衣尤誤

又案幕人下士虎賁下大夫趣馬下士綴衣職比幕人而次于虎賁趣馬之間其亦士官歟

褚師

襄二十年左傳季武子如宋褚師段逆之

昭二年左傳鄭公孫黑請呂印爲褚師集解云褚師市官疏云蓋相傳說也

昭十二季左傳衛公孟惡褚師圖

案褚師之官諸國皆有之必周官也杜謂市官周禮地官司市之屬無褚師之名故疏云蓋相傳說目疑之考成三季傳云荀罃在楚鄭賈人有將寘諸褚中目出褚字杜無解林堯叟云絮也又師古漢書南粵傳注云目綿裝衣曰褚據此二條褚師必係掌絲絮之官蓋典絲典枲之類周禮典絲典枲入天官而此入冬官者彼从典婦功之職此从其用之時也

又案典婦功中士典絲典枲皆下士此亦中下士爲之歟

工正

莊二十二季左傳齊侯使敬仲爲工政集解云掌百工之官

宣四年左傳楚蒍蕡賈爲工正

案楚官爲工尹此言工正傳文之誤然職本相同故仍之

襄九年左傳宋災使皇鄖命校正出馬工正出車備

甲兵庄武守疏云車馬甲兵司馬之職使皇鄖掌此事皇鄖必是司馬也周禮司馬之屬無主車之官巾車車僕職皆掌車乃爲宗伯之屬昭四季傳云夫子爲司馬與工正書服是諸侯之官司馬之屬有工正主車也

案諸侯之官多兼職故工正屬於司馬王國則自屬冬官也

文十年左傳楚成王使子西爲工尹集解云掌百工之官

又楚爲工尹者有工尹齊工尹商工尹襄工尹路工尹赤工尹麋工尹壽工尹固諸人

案楚官多自尹爲名所謂工尹卽工正也

昭十七季左傳鄭子論官曰五雉爲五工正利器用正度量夷民者也集解云五雉雉有五種西方曰鶡雉東方曰鵠雉南方曰翟雉北方曰鶴雉伊洛之南曰翬雉夷平也疏云爾雅說四方之雉唯南方不同賈逵云西方曰鶡雉攻木之工也東方曰鵠雉搏埴之工也南方曰翟雉攻金之工也北方曰鶴雉攻皮

之工也伊洛之南曰翬雉設五色之工也樊光注爾雅四方之雉配工亦與賈同唯翬雉不配工耳案賈樊所言之工出于考工記耳而考工記更有刮摩之工凡有六工非唯五也且記是後世之書少皞時工未必如記所說又目工配雉無所憑據不可采用故杜不言雉聲近夷雉訓夷夷爲平故目雉名工正之官使其利便民之器用正丈尺之度斗斛之量所目平均下民也

案賈樊所言雖不可以說少皞時官然既名爲五

工正則必兼統衆工而周家工正之總衆職可知矣

工師

禮月令季春命工師令百工審五庫之量金鐵皮革  
筋角齒羽箭幹脂膠丹漆毋或不良百工咸理監工  
日號毋悖于時毋或作爲淫巧目蕩上心注云工師  
司空之屬官也五庫藏此諸物之舍也量謂物善惡  
之舊濃也幹器之木也凡軼幹有當用脂良善也咸  
皆也于百工皆理治其事之時工師則監之日號令

之戒之目此二事也悖逆也百工作器物各有時逆  
之則不善時者若弓人春液角夏治筋秋合三材冬  
定體之屬也淫巧謂偽飾不如法也蕩謂動之使生  
奢泰也疏云周禮考工記無工師知是司空屬官者  
目司空掌工巧此稱工巧師長故知司空之屬五庫  
者熊氏云各目類相從金鐵爲一庫皮革筋爲一庫  
角齒爲一庫羽箭幹爲一庫脂膠丹漆爲一庫義或  
然

又孟冬命工師効功陳祭器案度程母或作爲淫巧

目蕩上心必功致爲上物勒工名目考其誠功有不  
當必行其罪目窮其情注云工師工官之長也効功  
錄見百工所作器物也主于祭器祭器尊也度謂制  
大小也程謂器所容也功不當者取材美而器不堅  
也疏云必功致爲上者言作器不須靡麗華侈必功  
力密致爲上

定十季左傳侯犯目郈叛武叔懿子圍郈弗克叔孫  
謂郈工師駟赤曰郈非唯叔孫氏之憂社稷之患也  
集解云工師掌工匠之官

孟子爲巨室則必使工師求大木注云工師主工匠之吏疏云所謂工師者師範也教也卽掌教百工者如漢書云將作少府秦官掌理宮室者是也

案工師者工正之佐也周禮遂師亞于遂人而左傳謂遂人爲隧正卜師亞于大卜而滕侯爲大卜自謂爲卜正又黨正之下有族師縣正之下有鄙師國語亦曰農師次于農正皆師爲正佐之驗也儀禮大射禮工人士與梓人升自北階兩楹之間疏數容弓若丹若墨度尺而午射正弦之注云工人士

梓人皆司空之屬能正方圜者一從一橫曰午謂畫物也疏云知工人士與梓人皆司空之屬能正方圜者冬官雖亡不知官屬之號見今考工記有三十官有梓人之官此工人士又與梓人同事故知冬官未亡時屬司空也云能正方圜者呂工巧之能知也云度尺者卽鄉躬記從如筭三尺橫如武尺二寸是也案謂之工人士者必工師之屬選其技之善而試爲士者也禮文王世子篇云曲藝皆誓之呂待又語三而一有焉乃進其等目其序此工人士之所

由選也

坊人

襄三十二季左傳子產壞晉館垣曰文公之爲盟主也坊人呂時塙館宮室集解云坊人塗者塙塗也疏云釋宮云镘謂之朽李巡曰镘一名朽塗工作具也郭璞云泥镘也然則坊是塗之所用因謂泥牆屋之人爲坊人塙亦泥也使此泥屋之人呂時泥塗客館之宮室也

梓人

儀禮大射禮文見前

案自梓人至矢人已見考工記此復載之者目見  
考工記三十工皆周官也

輪人

禮雜記古者貴賤皆杖叔孫武叔見輪人目其杖關  
轂而輶輪者于是有爵而後杖也注云輪人作車輪  
之官疏云闕穿也輶迴也

輿人

孟子子如通之則梓匠輪輿皆得食于子子注云梓匠

木工也輪人輿人作車者也疏云梓人成其器械㠯利用匠人營其宮室㠯安居輪人作車輪㠯運行輿人作車輿㠯利載

又云梓匠輪輿能與人規矩不能使人巧

玉人

襄十五季左傳宋人或得玉獻諸子罕子罕弗受獻玉者曰㠯示玉人玉人㠯爲寶也故敢獻之子罕曰我㠯不貪爲寶爾㠯玉爲寶若㠯與我皆喪寶也不若人有其寶子罕寘諸其里使玉人爲之攻之富而

後使復其所集解云玉人能治玉者疏云我得不貪女得其玉是我女二人各有其寶

孟子今有璞玉於此雖萬鎰必使玉人雕琢之

陶正卽陶人之長

襄二十五季左傳鄭子產獻捷于晉晉人問陳之罪對曰昔虞闕父爲周陶正呂服事我先王我先王賴其利器用也與其神明之後也庸呂元女大姬配胡公而封諸陳呂備三恪集解云庸用也胡公闕父之子滿也

陶人

禮喪大記陶人出重鬲疏云陶人作瓦器之官也重  
鬲見前

冶氏

孟子曰粟易械器者不爲厲陶治疏云陶作瓦器之  
匠也治鑄金之匠也

輝人

考工記作鞶人

禮祭統夫祭有界輝胞翟闢者惠下之道也輝者甲  
吏之賤者也胞者肉吏之賤者也翟者樂吏之賤者

也闢者守門之賤者也注云煥周禮作鞞謂鞞磔皮革之官也翟謂教羽舞者也疏云案周禮考工記鞞人爲皋陶鄭云皋陶鼓木也言鞞人之官掌作鼓木張皮兩頭輓之目爲鼓是鞞磔皮革之官云翟謂教羽舞者也者羽翟羽故邱詩云左手執籥右手秉翟翟卽狄也古字通用

案經中所言狄人凡有二等一則樂狄此所稱是也其職屬於地官舞師目執翟羽而舞因目爲名一則僕隸書顧命狄設黼辰綵衣禮喪大記狄人

設階狄人出壺是也屬於秋官司隸其職云邦有  
祭祀賓客喪紀之事則役其煩辱之事掌帥四羣  
之隸使之皆服其邦之服執其邦之兵守王宮與  
野舍之厲禁據云喪紀役煩辱之事卽設黼辰設  
階之事云帥四羣之隸故名之爲狄人也

函人

弓人

矢人

孟子矢人豈不仁於函人哉矢人惟恐不傷人函人

惟恐傷人

又云人役而耻爲役猶弓人而耻爲弓矢人而耻爲矢也

儀禮大射禮賓之矢則呂授矢人于西堂下注云是言矢人則納射器之有司各呂其器名官職不言君矢小臣呂授矢人于東堂下可知

案曲禮天子之六工土工金工石工木工獸工草工典制六材鄭云此亦殷時制也周則皆屬司空土工陶旗也金工築冶鳬巢段桃也石工玉人磬

人也木工輪輿弓廬匠車梓也獸工函鮑韁革裘  
也唯草工職亡蓋謂作葦葦之器據此所述雖殷  
官而周官呂之爲準則葦葦之官亦周所必有也

### 都司空

### 家司空

案春官有都宗人家宗人夏官有都司馬家司馬  
秋官有都士家士則冬官必有都司空家司空矣  
天地二官無都家之官者治教不出于下也

又案都宗人都司馬呂上士爲之長者重祭祀嚴

軍旅也軍事尤煩故備三等之士而史胥徒倍于都宗人都士主刑獄非祭祀軍旅之比故呂中士爲之長而府史胥徒同于都宗人者事相埒也都司空掌工役亦非春夏二官之比則其官應同都士蓋中士二人下士四人府二人史四人胥四人徒四十人也家司空亦如都司空之數

附

文十七季左傳諸侯會于扈晉侯不見鄭伯呂爲貳于楚也鄭子家使執訊而與之書呂告趙宣子

集解云執訊通問訊之官案采芑詩云執訊獲醜  
皇矣詩云執訊連連執訊二字實本于此鄭孔俱  
云執其可言問者不目爲官名今子家所使既不  
可云執晉人之可言問者而鄭官別有行人之名  
論語云行人子羽修飾之又不可云卽行人之官意當時行人  
之下更有是職也

成十季左傳晉侯欲麥使甸人獻麥饋人爲之召  
桑田巫示而殺之案周官無饋人之官膳夫職云  
凡王之饋食用六穀膳用六牲云云疑因此名之

也

襄二十一季左傳樂盈請歸死于尉氏集解云討姦之官疏云尉氏主刑人故爲討姦之官周禮司寇之屬無尉氏蓋周室旣衰官名改易于時有此官耳今案晉官有軍尉輿尉秦官有大尉皆掌兵之官疑屬夏官此疏云屬秋官未知其的

魯語天子少采夕月與大史司載糾虔天刑案司載不知何官秋官司盟職云掌盟載之灋盟萬民之犯命者詛其不信者與大史職約劑亂則辟灋

不信者刑之正同疑卽此官韋昭曰爲馮相保章  
之職恐未可信

吳語楚靈王親獨行屏營傍徨于山林之中三日  
乃見其涓人疇解云涓人卽中涓案師古曰中涓  
親近之臣若謁者舍人之類涓潔也主居中涓潔  
也此官始秦楚所置漢世因之擬之周官乃宮人  
之職大抵秦楚立官多異如楚有莫敖令尹箴尹  
連尹宮廡尹諸名秦有庶長大良造不更諸爵皆  
不可㠭周官律之也

又案經傳官名與周官小異而實不異者甚多畧舉言之如司宮左傳卽宮人賈正左傳卽賈師山人左傳卽山師縣人左傳卽縣師漁師令卽漁人委吏子孟子卽委人場師孟子卽場人麓國語卽林衡又如雍正儀禮乃內外饔之長馬正馬師左傳乃家司馬之長與佐候正左傳校正左傳乃候人校之長尚書大正乃大僕之長逸周書大正乃司寇之長理令卽獄吏士師也行理左傳卽行人之吏行夫也大酉月卽酒官之長酒正也彌宗逸周書宗人之屬泰士彌士逸周書士師

之屬夏祝商祝

儀禮及禮記

喪祝之屬巷伯

左傳及詩

內小

及詩及左傳

臣之等泠人

左傳

樂師之等公族

魏詩及左傳

餘子

左傳諸傳

子之職公路

魏詩及左傳

差車

左傳

巾車典路之職皆有

可考唯大政所云常伯常任準人今不可考耳